

INUIT ATAQATIGIIT

INATSISARTUNI



Nuuk, 13. december 2010

Inatsisartut suleriaasianni § 37 naapertorlugu matumuuna imaattunik Naalak-kersuisunut apeqquteqarpunga:

1. Inuit angerlarsimaffeqanngitsut, illunik iserfissaqanngitsut pillugit, paasissutissat annertusarneqarnissaat pissutsinillu nukittorsaanissaq pillugu suliaq sumut killippa?
2. Ullumikkut nunatsinni Namminersorlutik Oqartussat Kommuunillu inissiaataanni attartortittakkani, inuit inigisaminnit anisitaasimasut qassiuppat?
3. Attartortut inigisaminniit anisitaagaangamik, pisortanit qanoq iliuseqarfigineqartarpat? Qanorlu ikiorserneqartarpat?
4. Nunatsinni inuit angerlarsimaffeqanngitsut (hjemløse) ullumikkut qanoq amerlatigineri ilisimaneqarpa?
5. Nunatsinni inuit angerlarsimaffeqanngitsut, Naalakkersuisuniit qanoq iliuseqarfiginiarneqarnerlutik?

(Inatsisartunut ilaasortaq Olga P. Berthelsen, Inuit Ataqatigiit)

Tunngavilersuut.

Inuit pisinnaatitaaffii naapertorlugit, inuit tamarmik pisinnaatitaaffigaat ineqartinneqarnissartik.

Inatsisartuni ilaasortaq Storm Ludvigsen IA, inuit angerlarsimaffeqanngitsut iserfissaqanngitsullu pillugit, aasaq 2009 Naalakkersuisunut, Inatsisartut Suleriaasianni §36 imm. 1 naapertorlugu apeqquteqarpoq. Naalakkersuisut apeqquteqaammut akissuteqarnermini (takuuk allakkat J.nr. 26.21.03, ulloq 10 aug.2009), angerlarsimaffeqanngitsut aammalu iserfissaqanngitsut pillugit, paasissutisanik annertusaanissamik pissutsillu nukittorsarnissaannik kissaateqarlutik allagaqarput. Taamatut kissaateqarneq naammassiniarlugu, qanoq iliuseqartoqarsimanersoq paaserusunnarpoq.

Inuit Ataqatigiinniit pingaartipparput nunatsinni inuit, arlaannik sunilluunniit peqquteqartumik inissaaleqilersimasut aqqusinermut inissiinnarnagit, inuttut pisinnaatitaaffii naapertorlugit sullinneqarnissaat.

1 feb. 2002 tikillugu Namminersornerullutik Oqartussat kommuunillu inissiaataanni attartortittakkani attartortunik, iniminnit anisitanik inisseeqqittarneq atuuppoq. Inisseeqqittarneq pisarnikuuvoq tamanna, politiinit piumasarineqarsimappat. 2002 tikillugu takussutissaqarpasinnigilaq nunatsinni angerlarsimaffeqanngitsut qanoq amerlatigisimanerinek. November 2008 Ilaqutariinnermut Peqqissutsimullu Naalakkersuisoqarfik, "Kalaallit Nunaanni angerlarsimaffeqanngitsut"-mik taallugu misissuisitsivoq.

Misissuinerup ersersippaa nunatsinni – Nuuk ilanngunnagu – angerlarsimaffeqanngitsut 514-ujusut. Qularnannigilaq Nuuk ilanngunneqarsimagaluarpat, kisitsit eqqartorneqartoq annertunerujussuussagaluarpoq. Taakku angerlarsimaffeqanngitsut assigiinngitsunik peqquteqarput.

Inuit Ataqatigiinniit pasitsaasseqqavugut, ullumikkut nunatsinni angerlarsimaffeqanngitsut amerliartuinnaarnerinut, ilaatigut inisseeqqittarnermik pissaaffiup kommuuninut nuunneqarsimanagera peqqutaqaataasoq. Tamanna uppenarsaatissaqartinnigilarput,

kisianni ukiut kingulliit ingerlanerini angerlarsimaffeqanngitsut amerliartorneri eqqarsaatigalugu, ilaatigut tamanna peqqutaasinnaasutut isumaqarfiginarpoq. Taamaattumillu paaserusunnarluni ullumikkut, inissiani attartortittakkaniit inuit anisitaasimasut qassiunersut.

Inuit kikkulluunniit sunilluunniit peqquteqarlutik angerlarsimaffeqanngitsut, ulluinnarni inuuniarnikkut, inooqatigiinnikkut, tarnikkut timikkullu atugaat sakkortoorujussuupput. Inuit taama inississimasut, arlalippassuartigut nukittussuseqaraluarput ajornartorsiutaannik ikiornegarunik, nunatta ineriartorneranut peqataaqataaalluarsinnaasunik. Nukiit amerlasuut atorfissaqartippagut, taamaattumillu qanoq iliuuseqarnissaq pisariaqarluinnarpoq.

Paasissutissat Naalakkersuisunit tunniunneqarumaartussat pisariaqartippagut, siunissaq ungasinnerusoq eqqarsaatigalugu, qanoq iliuuseqarniarnissatsinnut atorfissaqartikkatsigit.